

Gui'ch bacaa San Judas

Rugajpdioz Judas b́en naj ree b́en gule Dios

¹Naj, Judas bijch Santiaaw, cayünan sirv Jesucrist, cucas gui'ch guie par lëjt najdi b́en ma gulej dux Dad ree Dios guial rënman lëjt, abi' dux Dad ree Jesucrist canaj lëjt. ²Gusnuu yaya Dios lëjt, yabe'cdxeman luxdoodi guiën tēēdi laaman.

B́en ad rnieet ree diidxli (2Pe. 2:1-17)

³Gradi compniar raliduladx ree Jesucrist, rënán lëjt, diidz gocli guyënan nixhialan gui'ch lojdi, din gagbeedi xcwent xhienaag naj perdon ni raya'p ree delant loj Dios, per yan ma bidxin dxej rüjn naguiejn gaxhalan gui'ch guie lojdi din ganin lojdi din guiniadi guialrliladx ni ma raya'p ree, ni nayaaloj, guial nayajc ree xbejn Jesucrist. ⁴Din yu' ree b́en rüjn b́en rliladx naabzi par go'ch reeman lojdi. B́en guin ree diidz gocli ma ragbee Dios guial rayal reeman casti, din ad rdxebt reeman laaman, rudxiib reeman guijc naj Dios benza'c, abi' naban reeman zi'ctzi rën reeman. Ad rtiëjbt reeman

nabee Jesucrist laa reeman, laaman naj tijbzi dux Dad ree b́en rniabee dunuj ree.

⁵Majsi ma ragbeedi ni ganin lëjt, per ganinan din gusaaladxidi guial majsi babëë Dios b́en Israel ree Egipto, per despuejs banijtaman b́en ad bililadxt ree laaman. ⁶Në ree anjl ad bazoobt xtiidx Dios niniabee reeman lod badëëman loj reeman, basiaawaman laa reeman lod nacay da't xt dxej güün xguialguxtisaman. ⁷Nëtëë ree b́en Sodoma con ree b́en Gomorra con ree guiedx gure gajxh, ad laat gubajn reeman, been reeman gra loj nidxuudx zi'ctzi guyën reeman, zeel basagzi Dios laa reeman, banijtaman baze'c tēëman laa reeman, laan naj ni rayal yaguiaa ree chitëë yaguieen ree zian.

⁸Per ni'czi zian, yan ziangajc rüjn ree b́en raguiil mod par go'chzi reeman lojdi, rüjn reeman xgab guial zajc güün reeman zi'ctzi rën reeman, ruxhiin laagajc reeman, ad rtiëjb tēët reeman nabee Jesucrist laa reeman, rnieeguijdx tēë reeman b́en naj ree xianjl Dios. ⁹Per chi gudildiidx ree arcangel Miguel con xindxab guijc xcuerp Moisejs, ni'quid bayaxt anjl guin niëjbaman

diidxguijdx loj xindxab guin, tijbzi ni rëbaman naj: “Ladxaa Dios gusa'nan lüj.” ¹⁰Abi' yan bën raguiil gajc ree mod go'ch reeman lojdi, rnieeguijdx reeman ni ad rignia't reeman, per nidxuudx rüjn reeman, ad rüjnt reeman laan xgab, contzi rüjn reeman laan zi'c ree be guial ad rüjnt reeb xgab. Zian cusëëb laagajc reeman delant loj Dios.

¹¹iProb laa reeman!, guial zinal reeman ni mal zi'c been Caín, mazri zinal reeman milia zi'c been Balaam, guiët tää reeman zi'c güt Coré chi guyënman niniabeeman luar Moisejs. ¹²Laagajc reeman ruxhiin lanij rüjndi chi rado'pidi din gawidi tijbzi, guidiblagaa ad ratut reeman raw reeman ad rüjn tää reeman xgab por ree bejn, rüjnz reeman xgab par cha lën reeman. Naj reeman zi'c zaj ni ad nët guia ni rinë bi, zi'c ree yag rbidx abi' ria'xh reen guial ad rtiat reen. ¹³Naj reeman zi'c xtüjp nijsdoo chi rajsan zro' da't, din zi'c ririi bichijn loj nijs guin, ziangajc sin guialxtu rüjn reeman nidxuudx ree, naj tää reeman zi'c ree bajl xanyabaa ni basëëb xnejz, dxel tiblyayaa ma rayal reeman lod nacay da't.

¹⁴Abi' bën brii laj Enoc, laaman gojc gajdx loj ree xdiaa Adán, guneeman xcwent ree bën guin chi rëbaman: “Naj baguiaa dux Dad Dios zidnë zien da't ree xianjlaman ¹⁵zidgaguieen xguialguxtisaman con gra ree bejn, din guiëbaman xhie casti rayal ree benmal por gra ni mal been reeman në por diidxguijdx ni gunee reeman laaman guial naj reeman bëndol.”

¹⁶Lasa' ree bën guin achetczi ruladx reeman, abi' graczi rnieeguijdx reeman. Zianczi rüjn reeman zi'ctzi rën reeman, abi' zianczi ruzat' laagajc reeman zagdxë ruzat' tää reeman bejn ree zagdxë din cwentzi güün ree bën guin ni rën reeman.

Mod rayal guiban ree xbejn Dios

¹⁷Per lëjt compniar raliduladx ree Jesucrist, rën da'tan lëjt, gol basaaladx guial bën goc ree xi apóstoles Dad Jesucrist ¹⁸rëb reeman: “Chi ma zidyob nit guidxliuj, chu' ree bën guze' gra ni zëed loj Dios güün tää reeman zi'ctzi naj xixgabdxuudx reeman.” ¹⁹Lasa' ree bën guin naj bën rlia' lasa' ree bën ma zinal xnejz Dios, abi' naban reeman zi'ctzi rën reeman, ad yu't xSprijt Dios luxdoo reeman.

²⁰Per lëjt compniar raliduladx ree Jesucrist, gol guzudxi'ch loj ni rliladxidi, din guialrliladx guin zëed loj Dios. Gol gurejdx gunab Dios con xyudar xSprijtaman. ²¹Gol basnuu gol binal guial rën Dios la'tgaj cabëzidi guidxin dxej gunee Jesucrist guialnaban tiblyayaa duloj ree guial rayaman dunuj ree.

²²Gol been yudar bën sta yu' nawëëg ree luxdoo. ²³Gol been yudar bën zë ree loj nejzmal, zi'c rüjn tijb bën rüjn yudar bën cayajb loj bajl, gol guyën reeman per ad chu'ladxidi zi'c rüjn reeman, gol gojp cudad chitëë yabidi loj xtol reeman.

Diidx bigra ca ree loj gui'ch guie

²⁴Yu' tijbzi Dios ca' guialrniabee par guiniaman lëjt, chitëë yabidi

loj dol, din chu' luxdoodi zagdxe
 sin dol chi guidxindi xanyabaa
 lod za'man. ²⁵Laaman naj tijbzi
 Dios b́en babēē dunuj ree loj
 dol por dux Dad ree Jesucrist,

rayalaman respejt din gra naj
 xieenman, tijbzi laaman ca'
 guialrniabee con guialguxtis
 diizd gocli, yan con gra tiampczi.
 Aḿen.